

Varietad culturala sco sfida e schanza

Il Chantun Grischun ha augmentà sia promoziun da cultura per annualmain trais milliuns

DA MARTIN CABALZAR/FMR

■ **Suenter ina viva e lunga debatta ha il Cussegl grond sancziunà en sia sessiun d'atun il concept per la promoziun da la cultura grischuna 2021-2024. En l'avignir stattan a disposiziun annualmain trais milliuns dapli per la promoziun da la cultura en noss chantun triling.** La FMR ha discurrì cun il schef dal departament d'educaziun, cultura ed ambient, cusseglier guvernativ *Jon Domenic Parolini* davart il nov concept da cultura dal chantun.

Il Cussegl grond ha approvà Voss concept da cultura e vul metter a disposiziun trais milliuns supplementars per la cultura, quai èn schizunt dus milliuns dapli che quai che la Regenza aveva proponì. È il minister da cultura tuttina cuntent cun questa decisiun?

La regenza grischuna ha fixà durant quist mais i'l preventiv per quist on chi vain 1 milliun per la realisaziun dal concept da promoziun da la cultura. La cumischium dal Grond cussagl chi'd ha preparà la fatschenda pel Grond cussagl ha dumandà i'l decuors da la preparaziun da quista fatschenda a l'uffizi da cultura ed a meis departamaint quants mezs cha no prevezessan per pudair realisar il concept. Stün basa da differents sclerimaints ha l'uffizi comunicà chi füssan necessariis 3 milliuns francs l'on sur ils prossems quatter ons. La cumischium s'ha laschà persuader da quists argumaints, ha fat quista proposta i'l plenum dal Grond cussagl ed ha gnü success. Quai sun mezs chi stan a disposiziun a la cultura grischuna.

Quest concept è vegnì deliberà independentamain da la crisa da corona actuala. Co giuditgais Vus l'influenza e las consequenzas da corona sin la scena culturala?

Schi, quist concept es gnü elavurà independentamain da la crisa actuala da corona. El correspuonda ad üna incumbensa dal Grond cussagl decisa i'l rom da la revisiun totala da la ledscha da cultura durant la sessiun da favrer dal 2017.

Corona ha consequenzas massivas per la cultura

L'influenza e las consequenzas da corona sun massivas per la cultura. Bleras persunas da la cultura han pers cumpletamain la pussibilità da's preschentar e da guadagnar o sun restrets lapro fermamaing. Arrandschamaints sun gnüts dits giò o spostats ed a tschertas gestiuns imnatscha la serrada.

Cun la decisiun dal cussagl federal da marcurdi passà cha arrandschamaints pon avair be plü ün public da maximalmain 50 persunas es dvantada la situaziun amo plü difficila. I nu's sa quant lösch cha quistas masüras d'uran. Güsta uossa avant il temp dad advent e Nadal es quist ün grond cuolp per las persunas da la cultura ed i manca darcheu dal tuot la sgürezza da pudair planisar a lunga vista.

Tge intent e tge finamiras ha la politica da cultura dal chantun Grischun?

L'intent da la politica da cultura es da reglar la promoziun, l'intermediaziun e la perscrutaziun da la cultura. Ella dess promover la lavur culturala, la partici-



FOTO MAD

paziun a la cultura, l'educaziun musicala dadour la scola ed ils fats da museum e da biblioteca.

Promover la diversitad

Las finamiras sun tenor la ledscha da la promoziun da la cultura: a) da promover la diversità culturala e linguistica in tuot il chantun; b) da sustgnair la cultura d'amatour e la cultura populara sco eir la lavur culturala professiunala illas differents spartas; c) da laschar as participar e tour part a tuot las gruppas da la populaziun a la vita culturala; d) da sustgnair la perscrutaziun, l'intermediaziun e la chüra dal patrimoni cultural e da la cultura contemporana; e) da facilitar il barat cultural; f) da garantir l'attractividad culturala dal chantun.

Tgi è insumma responsabel per la cultura? È quai la Confederaziun, il chantun, las regiuns u las vischnancas grischunas?

Per la promoziun da cultura dal man public sun tenor l'artichel 69 da la constituziun federala in prüma lingia respunsabels ils chantuns. L'artichel 90 da la constituziun chantunala disch cha il chantun ed ils cumüns promovian la lavur artistica, culturala e scientifica e promovian il barat cultural. Els piglian lapro resguard a la pluralità linguistica e las particularitats regiunalas. Tenor artichel 3 da la ledscha da promoziun da la cultura promovian il chantun, las regiuns ed ils cumüns i'l rom da lur cumpetenza cumünavelmain la vita culturala.

Actualmain es uschea cha blers cumüns e regiuns nun han reglè sün basa d'üna ledscha la promoziun da la cultu-

ra. Las activitats da promoziun variechan eir fermamaing.

Tge spartas culturalas vegnan promovidas primarmain dal chantun?

La ledscha da promoziun da cultura es la basa da l'actività da promoziun e là staja scrit chi's tratta da tegner quint da la pluralità culturala dal chantun. L'actività culturala es richa in differents spartas e regiuns, i'l sector da la cultura da laics e da professiunals. I'l concept da promoziun da cultura vain preschanta e visualisà quai extendüdamain.

Tge sfidas supplementaras sa resultan per la promoziun da cultura en il Grischun triling?

Sfidas i'l sen da schanzas saja üna pruna in Grischun. La varietà e la pluralità da las activitats culturalas in Grischun es fich gronda. Il fat cha in Grischun s'han svilupadas las bleras vals da maniera independenta ed autonoma ha manà ad üna gronda varietà chi's manifestescha eir illa ricchezza da las linguas, dialects ed idioms.

Pro la promoziun da la cultura esa da tgnair quint da quista pluralità ed eir dal fat chi da fich blera cultura populara i'ls sectuors da chant, musica, teater, custüms e bal, però eir i'ls differents sectuors da la cultura professiunala.

Tgi duai cumzunt profitar dal surpli da trais milliuns?

Pro'ls trais puncts dal concept da promoziun pels ons 2021 fin 2024 prevezan il rinforzimaint da la participaziun culturala da tuot las parts da la populaziun, il rinforzimaint da la pluralità linguistica e regiunala e sco terza il rinforzimaint da las cundiziuns da produczuon per la lavur culturala.

Gronda ritgezza da linguas

Per ragiundscher quists böts stan a disposiziun 2 milliuns francs per incumbensas da prestaziun cun instiuziuns culturalas sco eir 1 milliun per projects. Quai adüna suot la cundiziun cha'ls credits vegnan deliberats dal Grond cussagl i'l rom dal preventiv annual. Ils mezs dessan ir a favur da quellas e quels

chi s'ingaschan per realisar masüras chi güdan a ragiundscher ils böts dals trais puncts da paisa dal concept da promoziun e quai in spezial illas regiuns dal chantun.

Sper la promoziun da cultura or da meds statals datti dentant anc autras funtaunas? Da quants meds po la cultura grischuna disponer tut en tut?

Ils raps per realisar il concept da promoziun da cultura 2021-2024 sun mezs ordinaris dal chantun. Dasper ils mezs ordinaris saja amo mezs finanziaus our dal fondo da la lotteria svizra. Quels mezs variechan tuot tenor l'actività da giovar. I'l preventiv 2021 sun quai ca. 4.9 milliuns.

Datti magari er ina tsebarta rivalitad tranter professiunals e laics cura ch' i va per reparter daners publics?

Nagina rivalitad tranter profis e laics

Eu nu constat üna rivalità tanter la lavur culturala professiunala e quella da laics. I da eir divers projects ingio cha laics e professiunals lavuran e prodüan cumünavelmain. Eu pens quia surtuot a chors, teater ma eir differents spartas da musica.

No vain uschea ün ricchezza culturala in nos chantun grischun! Important esa da predschar tuot las differents spartas da cultura. Fitg bleras fuormas dad activitats culturalas han lur güstificaziun.

Tenor tge criteris vegn concedi contribuziuns chantunals per projects da cultura?

Ils criteris per dar sustegn finanziau a projects culturalas sun eir fixats illa ledscha da promoziun da la cultura. Quai sun üna jada criteris qualitativs. Implü vain resguardà l'importanza dal project pel Grischun sco eir l'accessibilità per üna participaziun activa e passiva da plü bleras persunas co pussibel.

Tgi decida la finala definitivamain sch' in project, in arranschament u ina activitad vegn sustegnì u er betg?

La decisiun definitiva vain tratta pro projects cun üna otezza da sustegn fin a 50 000 francs dal departamaint e du-

mondas da sustegn plü otas van pro la regenza.

La cultura ha era in grond potenzial turistic per noss chantun. Co quintan ins sensibilisar ils turistichers ed ils giasts per la cultura grischuna?

La cultura ha in potenzial turistic

Quia saja plüssas pussibilitats sco ün meglder intreschamaint da las instituziuns e persunas da la cultura cun ils portaders da prestaziuns turisticas respectivamain üna cooperaziun plü intensiva tanter cultura e turissem o lura eir sportas culturalas bain definidas sco gitas culturistoricas ed architectonicas, referats sur da temas culturalas, prelecziuns o oters arrandschamaints chi mannan la cultura plü dastrusch al giast. La gronda varietà da la cultura culinaria es eir ün aspet turistic attractiv. Il giast vuol avair bels evenimaints durant seis segiorn e qua giova la cultura cun sia gronda varietà üna gronda rolla.

La cultura generescha pia er ina considerabla plivalur economica. Pon ins quantifitgar quella?

I nu da ün stüdi actual chi documentess la valur economica da la cultura pel Grischun. Id es però ün fat cha la cultura es dvantà ün factur important pel turissem in diversas regiuns. Eir la cultura dals e pels indigens sa esser ün factur economic important in Grischun. La cultura nun as lascha però be masürar in francs e raps, la cultura es per blers da no üna part importanta da nossa vita, da nossa qualità da vita.

Tge spartas da cultura giaschan spezialmain a cor al minister da cultura?

Eu vegn adüna darcheu a tadlar concerts da musica e chant, minchatant a teater, visit exposiziuns in museums, taidl referats ed oter plü. Eu giode e sun superbi da la gronda varietà e da l'ota qualità da la sporta culturala da laics e da professiunals cha no vain in Grischun!

L'intervista è vegnida fatga en scrit.



La cultura è daventada in factur economic impurtant en las regiuns. Il chor d'uffants Sumvitg cun sia dirigenta Flavia Walder-Hublard en acziun. FOTO THEO GSTÖHL/CHOR D'AFFONS SUMVITG, 2017